

1421-agosto-31, Murcia. Carta de pago otorgada por Juan Artero y su mujer Mari Alvarez, vecinos de Murcia, a favor de Juan Pérez, reconociendo haber recibido el importe de la venta anterior. MBAM, Perg. orig. nº 39, doc. 2.º

Sepan quantos esta carta vieren commo nos Juan Artero et [Mary Al]juares su muger, vezinos de la çibdat de Murçia, otorgamos e conosçemos en buena verdat que auemos auidos e rescëbidos de vos, Juan Perez, vezino otrosy de la çibdat de Murçia que presente sodes, aquellos mill e doze marauedis e medio de dos blancas el marauedi desta moneda <agora> corribile de nuestro sennor el rey, que es todo el presçio por quanto nos a vos vendiemos francas, libres et quitas, quatro tafullas et media de tierra blanca que son en Tellaçager, huerta de Murçia, con carta publica ende fecha por el notario yuso escripto. Los quales dichos mill e doze marauedis e medio vos nos diestes e pagastes e pasaron de vuestro poder al nuestro en doblas de oro moriscas, en presençia del notario e testigos yuso escriptos.

Onde renunçiamos a la ley de la innomerata pequnia et del auer non contado e non auido e non rescëbido, e a exsepçion de enganno. E porque de los dichos mill e doze marauedis e medio nos tenemos e otorgamos de vos por bien pagados a toda nuestra voluntad et plazer, fazemos ende a vos e a los vuestros buena fin e quitamiento et absoluçion e postura espeçial de vos los non demandar en algund tiempo, puramente e quita sin todo retenimiento, de commo mejor e mas conplidamente puede e deue ser dicho, escripto, entendido e declarado al vuestro e de los vuestros saluamiento bueno e sano entendimiento e sin enganno.

Fecha la carta en la muy noble çibdat de Murçia, pos[trimero] dia de agosto, anno del nasçimiento del Nuestro Saluador Ihesu Christo de mill et quatroçientos e veynte e vn annos.

Testigos son desta carta [llamados] e rogados Simon de Sant Mateo e Gonçalo Ponç e Diego Lopez, vezinos de Murçia.

Yo Pero Fabregues, notario de la muy no[ble] çibdat de Murçia que esta carta fiz e escriui e al otorgamiento della en vno con los dichos testigos presente fuy, e a pedimiento del dicho Johan [Perez la saque] en esta publica forma, et yo çerrela con sobrepuesto entre renglones o diz "agora", e non le enpesca. Et en testimonio de verdat fiz aqui este mio acostunbrado sig (*signo*) no.

